

Naqqiut

Saqqummiussissut 13. marts 2017 ullulerneqartoq taarserpaa
(Naalakkersuisup taaguutaa allanngortinneqarpoq)

Uunga siunnersuut: Upalungaarsimanermut inatsimmi aalajangersakkat ilaasa atuutilersinneqarnerannik Kalaallit Nunaannut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffisassaattut siunnersuut.

(Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoq)

Saqqummiussissut

(Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoq)

Siullermeenera

UKA/2015-imi matumunnga tunngatillugu: ”Atomip nukinganit atortussiat inissisimaffiini isumannaarinissaq pillugu isumaqatigiissummut allannguut” Kalaallit Nunaannut nangaassutip atuukkunnaarnissaa pillugu oqaaseqaat pillugu Inatsisartut aalajangiussineq akuersissutigaa.

UKA/2015-imi Inatsisartut aalajangiussinerisa kingunerisaatut upalungaarsimanermut inatsimmi aalajangersakkat aalajangersimasat atuutsilernissaat pillugit Kalaallit Nunaannut peqqussummut Namminersorlutik Oqartussat oqaaseqaatissaat pillugu Inatsisartut aalajangiiffisassaannut siunnersuut manna saqqummiunneqarpoq.

Kalaallit Nunaannut atuuttussanngorlugu Kunngaqarfiup Danmarkip 1980-imi atomip nukinganik atortussiat inissisimaffiini isumannaarinissaq pillugu IAEA-mi isumaqatigiissut akuersissutigaa. 2010-mi allannguutissatut isumaqatigiissut Kunngaqarfiup Danmarkip akuersissutigaa, taamaattorli Kalaallit Nunaannut allannguutissatut isumaqatigiissutip atuussinnaaffianik nangaanartortalerlugu.

Allannguutissatut isumaqatigiissutikkut atugaqarsinnaaffigisaq allineqarpoq, ingammik tassani atomip nukinganik atortussianik aamma atomip nukinganik ingerlatsiviit inissisimaffiini isumannaarinermi sabotagemut ilaatitsisoqalermat. Isumaqatigiissut malillugu atomip nukinganik atortussianik tillinniarnernut, allatullu pisussaaffeqarani pigisaqalernernut atomip nukinganik atortussiat sorsunnerunngitsumut siunertanut atorneqartut illersorneqassapput.

Isumaqatigiissummut allannguut 8. maj 2016-imi atuutilerpoq, isumaqatigiissullu maannakkut ima taaguuteqartinneqalerpoq: ”Atomip nukinganik atortussianik aamma atomip nukinganik ingerlatsiviit inissisimaffiini isumannaarinissaq pillugu Isumaqatigiissut”.

Tamanna tunngavigalugu isumaqatigiissut, kiisalu isumaqatigiissut eqquutsinniarlugu aammalu IAEA-mit inassutaasut malillugit atomip nukinganik atortussianik aamma atomip nukinganik ingerlatsivinnik sillimaniarnermut tunngatillugu iliuuserisassat pisariaqartut iliuuseqarfiginissaannut toqqammavissamik qulakkeerinninniarluni upalungaarsimanermit inatsisip allanngortinnissaa pillugu inatsit saqqummiunneqarpoq.

Kalaallit Nunaannut upalungaarsimanermit inatsisip allanngortinnerata atuutsilerneratigut Danmarkimi atuuttunik, aammalu isumaqatigiissummut malitseqartitaasunik Kalaallit Nunaanni sillimaniarnermut tunngasutigut iliuuserisanut tunngatillugu malittarisassiat assigiit atuutsinneqalissapput.

Naalagaaffimmi qullersaasut pilersaarusiornissamut pisussaaffigisaat pillugit upalungaarsimanermit inatsimmi § 22-mi aamma 26-mi aalajangersakkani Kalaallit Nunaannut atuutsitsilernissaq pillugu peqqussummik Inatsisartut UKA 2016-imi akuersissuteqarnissartik aalajangiuppaat. Atomip nukinganik atortussiat aamma atomip nukinganik ingerlatsiviit inissisimaffiini isumannaarinissaq pillugu upalungaarsimanermit inatsimmi aalajangersakkat atuutsilernissaat pillugit peqqussusiornermut atatillugu Illersornissamut Ministereqarfik upalungaarsimanermit inatsimmi iliuuserisanut kinguneqartitsisarnermut aalajangersakkanut peqqussummut atasunik inatsisilioriaatsikkut apeqqutissat arlalialuit malugivai. Atomip nukinganik atortussianik aamma atomip nukinganik ingerlatsiviit inissisimaffiini isumannaarinissaq pillugu malittarisassianik naapertuutsisisinnaanissamut iliuuserisanut kiguneqartitsisarnermut aalajangersakkat aalajangiisuupput.

Inatsisilioriaatsikkut ajornartorsiut taanna peqqussummik tamarmiusumik atuutsitaqarnikkut iluarsiviginiarneqarsimavoq, tassaniillutik upalungaarsimanermit inatsimmi aalajangersakkat siusinnerusukkut Inatsisartunit oqaluuserineqarsimasut, aammalu atomip nukinganik atortussiat aamma atomip nukinganik ingerlatsiviit inissisimaffiini isumannaarinissanut tunngatillugu aalajangersakkat upalungarsimanermit inatsimmi §§ 37 a, 37 b aamma 37 c-miittut, kiisalu inatsimmi § 70-imi iliuuserisanut kinguneqartitsisarnermut aalajangersakkat attuumassuteqartut.

Imarisaanut erseqqinnerusunut tunngatillugu peqqussummut allaqqaagaq aamma imaqaarniliaq agguanneqartut innersuussutigissavakka.

Taamatut oqaaseqarlutik upalungaarsimanermit inatsimmi aalajangersakkat aalajangersimasut atuutsilernissat pillugit Kalaallit Nunaannut peqqussummik akuersissuteqarnissamut Namminersorlutik Oqartussat akuersissuteqarnerminnik oqaaseqarsinnaanerannik Naalakkersuisut inassuteqassapput.